



**Kinguaassiutitigut atornerluisoqarsimatillugu ilaqutariit eqqugaasut
ataatsimoortillugit avissaartuutsinnagit piffinni katsorsaqtigiittalernissaat
anguniarlugu qanoq iliuuseqartoqarsinnaanera pillugu apeqquteqaat aallaavigalugu
Inatsisartunut oqallisissiaq.**

(Inatsisartuni Siumup gruppiani ilaasortat).

Inuit Ataqatigiit oqallisissiamut pingaaruteqartumut qujapput.

Ilaqutariit ilivitsut – sullissineq ilivitsaq

Ilaqutariit ilivitsutut isigalugit, inuuneq tamanut ataqqinassusilik tamallu ataatsimuussutsimi inissaqartinneqarnissaat isumaginninnikkut sullissinnermi qitiutinneqartariaqarpoq. Isumaginninnermi sullissineq ilivitsuusaaq ilaqutariit ilivitsut ataatsimut isigalugit.

Nunatsinni ilaqutareeriaaseqarpugut immikkuullarilluinnartumik. Illooqqagut qatanngutitut isigisinnaasarpagut, ajaakkut angaakkut/atsakkut akkaakkullu aanaatut aataatullu isigisarpavut. Taamaattumik ilaqutareeriaaseqarnerput immikkuullarissaq isumaginninnikkut isiginiassallugu pingaaruteqarpoq. Aamma isumaginninnikkut sullissinnermi immikkuullarissumik ilaqutareeriaaseqarnerput ukkatarissallugu pinngitsoorneqarsinnaanngilaq, ilaqutariit ataatsimoortillugit katsorsarneqartassappata immikkuullarissumik ilaqutareeriaaseqarnerput qitiulluinnartariaqarmat.

Anguniagaraarput ilaqutariit qitiutillugit, imminut namminneq akisussaaffeqarlutik inuuneqarnissaat. Ilaqutariit kikkulluunniit meerartaqarpata utoqqartaqarpata toqqissillutik peqqissumik imminnut paarinissaat naleqartillutik, ilaqutariit toqqissisimasut, inuiaqatigiit ikioqatigiillutik. Ilaqutariittut inuunermi meeqqat akisussaaffimmik ilinniartinneqartarnissaat pingaartinneqarpoq.

Ilaqutariinnut politikki tamanut inissaqartitsisoq naaperiarfiusorlu

Isumaginninnermi ilaqutariinnut politikki suliffeqarfeqarnermut politikkimut naapertuuttumik pilersinneqartariaqarpoq. Suliffeqarneq akilersinnaajuaannassaaq, sumiiffinnilu sulisinnaasut tamakkerlutik inuit ataasiakkaat sulilersinnaaqqullugit suliffinnik pilersitsisariaqarpugut ilaqutariit inuussutissaqarluartikkumallugit, toqqissisimasumik patajaatsumillu ilaqutariit inuuneqarnissaat qulakkeerumallugu. Ilaqutariit patajaatsumik toqqammavissaqartikkumallugit, meeqqat kinguaassiutitigut atornerlunneqannginnissaat siunertaralugu suliffissaqarniarnikkut periarfissat annertusartariaqarput.

INUIT ATAQATIGIIT

Inatsisartuni



Ilaqutariinnut politikkimik Naalakkersuisut suliaqarnertik Naalakkersuisut oqariartuutigisaqattaarpat. Ilaqutariinnut politikkimik suliaqarneq pitsaalluinnarpoq. aamma Ilaqutariinnut politikki inuiaqatigiit ingerlaasianni pinngitsoorneqarsinnaangilaq. Taamaattorli ilaqutariinnut politikki qanoq iluseqarluni saqqummerumaarnersoq, kinguaassiutitigut atornerlugaasimasut pillugit qanoq suliniuteqartoqarumaarnersoq suli takujuminaatsipparput. Tassami upernaq manna isumaginninnermut siunnersuutit toqqammaviisigut partiinit isumaqatigineqaraluarlutik, Naalakkersuisut ilaqutariinnut politikkimik ingerlatsilereernerat sulianillu assigiinngitsunik ingerlataqareernerat toqqammavilersuutigineqarlutik isumaginninnikkut siunnersuutit iluatinnaateqartut arlallit ipitiinnarneqarput. Taamaattumik Naalakkersuisut kajumissaarusuppagut ilaqutariinnut politikki pillugu Ataatsimiititaliaq susassaartoq, partiillu illua-tungiliuttuugaluarpataluunniit qanimut ammasumik kikkunnillu tamanik inissaqartitsisumik oqaloqatigiittoqarnissaanik aallartitseqqullugit. Tamatta kinguaassiutitigut atornerluisarneq akiorusuppaput, matumanilu ilaqutariit nukittuut pilersikkumallugit kinguaassiutitigut atornerluisoqarsimatillugu ilaqutariit avissaartuutsinnagit katsorsaanerit ingerlatalernissaat ilaqutariinnut politikkisami naqissusertariaqarpoq.

Katsorsaallutik angalaaqatigiittartut amerlanerusut atorfissaqartinneqarput

Meeqqanut kinguaassiutitigut atornerluisoqarsimatillugu Nuna tamakkerlugu siusissukkat katsorsaasarneq salliutissavarput. Ullumikkut meeqqanik kinguaassiutitigut atornerlunneqarsimasunik katsorsaallutik angalaaqatigiittartunik marlunnik peqarpoq. Maannakkut meeqqanik inuusuttunillu kinguaassiutitigut atornerlunneqarsimasunik katsorsaallutik angalaaqatigiittartut amerlineqarnissaat pillugu Naalakkersuisut pilersaaruteqanngillat. Tamanna § 37 naapertorlugu apeqquteqaatinni nr. 143/2019-imi atuarneqarsinnaavoq.

Kinguaassiutitigut atornerluisoqarsimatillugu ilaqutariit ataatsimoortillugit pilertornerusumik katsorsarneqartalernissaat anguniarlugu meeqqanik atornerlunneqarsimasunik katsorsaajartorlutik angalaaqatigiittartunik amerlanerusunik pilersitsinikkut pisinnaasariaqartoq isumaqarpugut, taamatullu ilaqutariinnut kingusissukkat kingunipilutsitsisunut angalaaqatigiittartunut katsorsaajartortunut aningaasat atugassiissutit annertunerusariaqarlutik. Katsorsaajartorlutik angalaaqatigiittartunut aningaasat atugassiissutit amerlineqarsinnaanerit partiit tamattaalluta naaperiarfissaqarpugut. Inuit Ataqatigiit tassuunakkut oqaloqataanissaminnut piareersimapput.

Allaffissornermi aaqqissuussaaneq innuttaasunut qanilaarnerusoq

Pisortat ingerlatsineranni allaffissornermi aaqqissuussaaneq ullumikkut atuuttoq annertuallaarujussuarpoq, innuttaasunullu ikorfartortarialinnut ungasippallaarujussuarluni. Pisortat ingerlatsineranni allaffissornermi aaqqissuussaaneq eqaallisartariaqarpoq. Inuiaqatigiit immitsinnut qanittunnguuvugut, inooriaasitsinnilu immitsinnut susassareqatigiinnerput ilaqutareeriaaseqarnerpullu qanittuaraalluni.

Taamaattumik allaffissornermi aaqqissuussaaneq uagut naleqartitatsinnut, inooriaatsitsinnut kulturitsinnullu naleqquttumik aaqqissuussisariaqarpugut.

INUIT ATAQATIGIIT

Inatsisartuni



Kommune Qeqertalik allaffissornikkut aaqqissuusseqqinnermigut maligassiuilluarpoq. Innuttaasunut qanilaarnerusumik, ilaqutariinnullu ikorfartortarialinnut malugineqarsinnaasumik allaffissornikkut aaqqissuusseqqinneq oqallisigiinnarnagu timitalerneqarnissaa sulissutigisariaqarpoq, ilaqutariit kinguaassiutitigut atornerluisoqarsimatillugu allaffissornikkut pilertornerusumik malugineqarsinnaasumillu sullinneqartalernissaat qulakkeerniarlugu, illersorneqarsinnaanngilarmi "pisortaarparujussuit" aqquusaartajooqqaarlugit aatsaat suliat ataasiakkaat ingerlanneqartassappata.

Ilaqutariinnut sullissiviit nalilersoqqittariaqarput

Ilaqutariinnut sullissiviit ilaqutariit isumassorneqarluarnissaat siunertarlugu Nuna tamakkerlugu atuupput. Ilaqutariinnut sullissiviit siunertamut atuunnermikkut naapertuuttumik ingerlalissappata, ilaqutariinnut sullissiviit nalilersorneqartariaqarput. Ilaqutariinnut sullissiviit ilaqutariinnut kinguaassiutitigut atornerluisoqarsimatillugu sullissinerat nukittorsartariaqarpoq. Ilaqutariinnut sullissiviit inerisarneqarnissaat eqqarsaatigalugu sinerissami misilittagarineqartut isumassarsiorfigineqarnissaat pingaaruteqarpoq.

Assersuutigalugu Aasianni Qaammaavik ukiorpassuarni ilaqutariinnut kinguaassiutitigut atornerluisoqarsimatillugu kingunerlutsitsinermik sullissinissamut ukiorpassuarni ineriartortitsisimavoq. Qaammaaviup aaqqissuussaanera kinguaassiutitigullu atornerluisoqarsimatillugu ilaqutariit ilivitsutut isigalugit suleriaaseqarnerat Qaammaaviup atugaalluarneranik sullissilluarneranillu kinguneqarpoq.

Assersuutit aappaattut Kujataani ilaqutariit isumassortariaqartut kinguaassiutitigullu atornerluisoqarsimatillugu nalaataqarsimasut Alluitsumiisillugit ilaqutariit avissaartuutsinnagit allatigullu pilersaarusionerisigut, timikkut, tarnikkut anersaakkullu mernguernartumik sammisaqaqatigiisinnerisigut suliniutit iluatsissimasut isumassarsiorfigineqarlutik qissimigaarneqartariaqarput.

Meeqqat inuusuttullu sumiginnagaasut ikilisinniarlugit Nuna tamakkerlugu iliuusissatut pilersaarut

Inuit Ataqatigiit ilaqutariit iluitsuutillugit aallunnissaat kissaatigaat. Tamatuma siusissukkut iliuuseqarneq qulakkiissavaa, pinaveersaartitsinerlu pitsaanerusequmik ingerlanneqarluni. Naggataagummi unammillernartitat ilaqutariinni ataasiakkaani pilersarput, tassaniiluna pinaveersaartitsinerit misileqqaartariaqarivut.

Taamaammat unammillernartitanut tamakkiisumik isiginittaaseqarnissaaq siunertarlugu suliniuteqarnissaaq aallartittariaqarparput. Meeraq sumiginnagaasoq kinguaassiutitigullu atornerlunneqarsimasooq aamma atuarfimmiiittarpoq, peqqissaasumiittarluni, arsaattartut klubianniittarluni ajornerpaagaangallu politiit aamma ulluinnarmini naapissinnaasarlugit. Kikkut tamarmik suliaminnik ataqatigiissaarissapput, kikkullu tamarmik pineqartumik kivitseqataassapput, taamaalilluni suliniutit susassaqarfiit assigiinngitsut akimorlugit ingerlanneqarsinnaaqullugit.

Taassuma saniatigut inuit ernumanermik isummakkullu nanertisimanermik eqqugaasartut sullilluarneqarnerunissaat qulakkeertariaqartoq isumaqarpugut. Tassami meeqqat inuusuttullu

INUIT ATAQATIGIIT

Inatsisartuni



minnerunngitsumik ilaqutariit kinguaassiutitigut atorerluisoqarsimatillugu kingunerlutsitsinermikkut ilaqutariit akornanni ernumanermik isummakkullu nanertisimanermik eqqugaasartut arlaqartut qularutissaanngimmat, Naalakkersuisut kajungissaarusuppagut inuit kingunerlutsitsisimasut ullumikkornit pitsaanerusumik atugaqalernissaat isumassorneqartalernissaat qulakkeeqqullugu.

Ulloq unnuarlu paaqqinnittarfiit

Ulloq unnuarlu angerlarsimaffiit pioreersut atorfissaqartinneqarput, aamma siunissami atorfissaqartinneqartuassapput, pisortat ingerlataat aammalu ulloq unnuarlu angerlarsimaffiit imminut pigisut. Ulloq unnuarlu angerlarsimaffiit imminut pigisut siunissami atorfissaqartinneqartuartaussapput, taakkuami pisortat utaqqiinnarnagit namminneg iliuuseqarlutik meeqqanut ilaqutariinnullu isumassortariaqartunut sullissinissamut naleqqussarsimasuupput.

Meeqqanik inuusuttunillu kinguaassiutitigut atorerluinerit ima ilungersunartigaat, allaat meeqqat inuusuttullu illersorniarlugit ulloq unnuarlu paaqqinnittarfinnut inissinneqartariaqartarlutik.

Ulloq unnuarlu paaqqinnittarfiit pioreersut inerisartuarnerisigut ilaqutariit ilivitsuutillugit sullissinermik piginnaasaqalernissaat sulissutigisariaqarpoq.

Sinerissami ulloq unnuarlu paaqqinnittarfinnik pioreersunik ingerlalluurtunik peqarpugut. Ulloq unnuarlu paaqqinnittarfik Qasigianguaniittoq "Puillasoq" ineriartortitsivigineqarnissamut periarfissagissaartut ilagimmassuk assersuutitut qaqilaarusuppara.

Ulloq unnuarlu paaqqinnittarfik "Puillasoq" kommunip ingerlatarivaa, meeqqallu isumassortariaqartut najugaqartuutugalugit.

"Puillasoq" qanittuaniipput kommunip inissiaatai inoqaratik pioreersut. Ulloq unnuarlu paaqqinnittarfik ilaterneqarsinnaavoq ilaqutariit ataatsimoorfigisinnaasaanik immikkoortortamik pilersitsinikkut.

Nunatsinni ulloq unnuarlu paaqqinnittarfiit pioreersut inerisaaffiginerisigut ilaqutariit avissaartuutsinnagit katsorsaasoqartalernissaa siunertaralugu kommuninut suleqatigiissutigineqarsinnaasunik periarfissanik ujartueqqullugit Naalakkersuisut kajumissaarusuppagut, Namminersorlutik Oqartussat kommunillu akunnerminni kinguaassiutitigut atorerluisoqarsimatillugu ilaqutariit avissaartuutsinnagit susassaartut akimorlugit suliniuteqartoqarnissaa qulakkeerniarlugu.

Taamatut oqaaseqarluta oqallisissiami partiit Naalakkersuisullu oqallilluarnissaannik kissaappavut.